

Borgmesterit soraarnerussutisiaat qinigaajunnaarnersiutaallu aammalu taakkua aappaasa meeraasalu taakkuninnga pissarsisinnaaneri pillugit Namminersorlutik Oqartussat nalunaarutaat

Kommunit aqunneqarnerat pillugu Inatsisartut inatsisaanni nr. 22, 18. november 2010-meersumi § 67 imm. 1 naapertorlugu aalajangersarneqarpoq:

§ 1. Borgmesteri nammineq soraarnerussutisiaqarnissaminut

qinigaajunnaarnersiuteqarnissaminullu §§-ini 2-miit 7-imut aammalu 9-miit 10-mut malittarisassat naapertorlugit pisinnaatitaaffeqarpoq.

Imm. 2. Aappaasoq meeqqallu borgmesterip toqukkut peerunneratigut qimataasut §§-ini 8-mi 11-milu malittarisassat naapertorlugit soraarnerussutisianut qinigaajunnaarnersiutinullu pisinnaatitaaffeqarput.

Nammineq soraarnerussutisiat

§ 2. Borgmesterip tunuarnermini nammineq soraarnerussutisiassai ukiut

soraarnerussutisiassaqaarfissai akissarsiaalu soraarnerussutisiaqaatissat naapertorlugit aalajangersarneqartassapput.

§ 3. Nammineq soraarnerussutisiassaqaqalernissamut ikinnerpaamik ukiuni arfineq-pingasuni sulereersimanissaq piumasaqaataavoq, takuulli imm. 4.

Imm. 2. Piffissaq suliffiusoq tassaavoq piffissaq pineqartup borgmesteritut suliffigisaa aammalu ukiuni qinigaaffinni arlalinni borgmesteritut sulisarsimanerit ilanngunneqartassallutik.

Imm. 3. Piffissaq suliffiusoq ukiunut ilivitsunut aammalu ukiup sulilerfiup aallartiffianit naatsorsorneqartassaaq.

Imm. 4. Borgmesteri nappaammik nakorsap uppersaasiinera naapertorlugu borgmesteritut suleqqinnissaminut akornuserneqarluni kommunalbestyrelsip akuersineratigut tunuarpat piffissaq suliffiusoq piffissamut tunuarnerup nalaani qinigaaffimmut tamakkiisumut naatsorsorneqartassaaq.

§ 4. Ukiut borgmesterip soraarnerussutisiassaqaarfissai piffissap suliffiusup naatsorsorneqartarnera naapertorlugu ima naatsorsorneqartassapput:

Piff. borgmesteriuffik: Ukiut soraarnerussutisiassaqaarfissat:

Ukiut 8-nit 10-nut	Ukiunut 28-nut naatsorsorneqassapput
Ukiut 10-nit 12-inut	Ukiunut 30-nut naatsorsorneqassapput
Ukiut 12-init 14-inut	Ukiunut 31-nut naatsorsorneqassapput
Ukiut 14-init 16-inut	Ukiunut 33-nut naatsorsorneqassapput
Ukiut 16-init 18-inut	Ukiunut 34-nut naatsorsorneqassapput
Ukiut 18-init 20-nut	Ukiunut 36-nut naatsorsorneqassapput
Ukiut 20-it sinnerlugillu	Ukiunut 37-nut naatsorsorneqassapput

§ 5. Borgmesteri nammineq soraarnerussutisalisassaaq borgmesteritut tunuarnermi nalaani nalinginnaasumik soraarnerussutisalersussatut 60-inik ukioqalereersimaguni imaluunniit ullormit taama utoqqaatigilerfimmunit.

§ 6. Nammineq soraarnerussutisiat tunuarnerup kingornagut tunniunneqartarnerisalu nalaani malittarisassat nunatsinni tjenestemandinut atuuttut naapertorlugit naatsorsorneqartarlutillu akit allanngorarnerinut iluarsisuteqarfigineqartassapput.

§ 7. Nammineq soraarnerussutisiaqalernissaaq aallartittarpoq § 9 naapertorlugu piffissaaq qinigaanersiutaaruffik qaangiukkaangat.

Imm. 2. Pineqartoq borgmesteritut qinigaqqippat soraarnerussutisiaqartitsineq unitsinneqassaaq.

Aappaasup meeqqallu soraarnerussutisiaqartitaanerit

§ 8. Aappaasup meeqqallu soraarnerussutisiaqartinneqartassapput malittarisassat nunatsinni tjenestemandinut atuuttut naapertorlugit.

Imm. 2. Naak borgmesteritut sulinerup qaangiutereerneratigut aappariilersoqaraluartoq nalunaarut manna malillugu aappaasup aappaasutut tamatigut soraarnerussutisiaqarsinnaatitaavoq. Taamatuttaaq meeqqat meerarissatut soraarnerussutisiaqarsinnaatitaapput naak borgmesteritut sulinerup qaangiutereerneratigut inunngoraluarlutik.

Qinigaajunnaarnersiutit

§ 9. Borgmesteri qinigaajunnaarnersiuteqartinneqartassaaq qaammammut pineqartup ukioq kingulleq sulinermini akissarsiaasa 1/12-iannik. Ukiut aallartinneqartut pineqartup borgmesteritut suliffigisai tamarmik qaammatip aappaata affaanik sivilissusilimmik qinigaajunnaarnersiuteqaatissaapput. Piffissarli qinigaajunnaarnersiuteqarfissaaq sivilunerpaamik qaammatinik 12-inik sivilissuseqarsinnaavoq.

§ 10. Borgmesterip tunuarnera pinerluttulerinermi inatsit naapertorlugu peqqussuteqarnermik nakkutigineqartussaannermilluunniit pissuteqarluni qinigaasinnaajunnaarnermik kinguneqarsimappat kommunalbestyrelsip inassuteqareerneratigut naalakkersuisunit aalajangerneqassaaq borgmesteri

nalunaarummi matumani malittarisassat naapertorlugit qinigaajunnaarnersiuteqarsinnaatitaassanersoq.

Aappaasup meeqqalu qinigaajunnaarnersiutininik pissarsisinnaanerit

§ 11. Borgmesterip toqukkut peerunnini tikillugu borgmesteritut sulisup imaluunniit toqukkut peerunnini tikillugu borgmesterip qinigaajunnaarnersiutaanik pissarsisartup aappaa piffissap qinigaajunnaarnersiuteqarfup sinnerani, sivisunerpaamilli borgmesterip imaluunniit borgmesteriusimasup toquneraniit qaammatini pingasuni, qinigaajunnaarnersiutininik pisartagaqarsinnaavoq.

Imm. 2. Borgmesteri toqukkut aappaminik qimataqanngippat qimataasorluunniit piffissap qinigaajunnaarnersiuteqarfup qaangiutinnginnerani toqukkut peeruppat qinigaajunnaarnersiuteqarsinnaaneq borgmesterip meeraanut sulii 18-iliisimanngitsunut, borgmesterip toqukkut peerunnerani tassannga angajoqqaatut oqartussaaffigisaasunut, pisinnaatitaaffinngussaaq.

Soraarnerussutisianik il.il. naatsorsuineq tunniussinerlu

§ 12. Soraarnerussutisianik qinigaajunnaarnersiutinillu naatsorsuineq, nalunaarut manna borgmesterinut soraarnerussutisiat imaluunniit taassuma aappaanut meeraanullu siusinnerusukkut malittarisassat atuuttut naapertorlugit tunniunneqartartut kommunimi borgmesteriusimasup kingullermik borgmesteriuffigisimasaani kommunimi kommunalbestyrelsimit isumagineqartassaaq.

Imm. 2. Imatut pisuni, tassani borgmesteri kingullermik borgmesteritut sulisimalluni kommunimi kommuniluunniit 1. januar 2009 tikillugu kommuniusimasuni, kommunimi siusinnerusukkut kommuniusimasumi kommunalbestyrelsimit borgmesteriusimasumut imaluunniit taassuma aappaanut meeraanullu soraarnerussutisiat naatsorsorneqarnerat tunniunneqarnerallu isumagineqartassapput.

§ 13. Borgmesterimut soraarnerussutisiat qinigaajunnaarnersiutillu, kommunimi ataatsimik amerlanerusumi qinigaasimanermut tunngasut, kommuninit pineqartunit annertoqatigiiaartumik akissarsiatut tunniunneqartassapput.

Atortuulersitsinerlutik aalajangersakkat

§ 14. Nalunaarut una atuutilissaaq ulloq 1. juni 2012 1. januar 2011-miit atuutilersumik.

Imm. 2. Borgmesterit qinigaajunnaarnersiutaat soraarnerussutisiaallu aammalu taakkua aappaasa meeraasalu taakkuninga pissarsisinnaaneri pillugit Namminersornerullutik Oqartussat nalunaarutaat nr. 23, 12. september 1997-imeersoq ilutigalugu atorunnaarsinneqarpoq 1. januar 2011-mi atuutilersumik.

Namminersorlutik Oqartussat, ulloq 24. maj 2012

Kuupik Kleist

/

Hans-Erik Bresson

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut